

Segun lider di PDR Andin Bikker, proyecto di Caya Grandi a costa Aruba 29 miyon florin

“Gobierno a malgasta placa grandemente den e proyecto di tram”

ORANJESTAD - Gobierno a malgasta placa grandemente den e proyecto di tram, segun Andin Bikker lider di Partido Democracia Real. Despues di a warda hopi pa e ley di “Landsverordering van spoorwegen”, esaki a yega Parlamento. Lider di partido a constata cu e total di e proyecto aki cu niun hende a bay eleccion cun’e, a costa pueblo minimo 29 miyon florin.

Bikker a yega na e cifra aki, pa cinco aña e lo costa 15 miyon florin fuera 1 miyon mas di e aña aki cu ta bira 16 miyon, pero tambe otro 3 miyon pa aña cu ta explota cu ta un otro 15 miyon y sin lubida e 100 mil florin di mantencion. Sin conta e gastonan di dia cu e tram a sali for di rails pa motibo di stof.

E gastonan aki ta yega mas o menos 29 miyon florin, sin conta cu e gastonan di kibramento di full e Caya, retrasonan cu tabata tin riba e proyecto, pero tambe sin

conta cu tur e gastonan di e 90 comerciantenan, 15 di nan a cera nan tienda caba. Esunnan cu a keda te cu dia di awe ta lucha pa mantene nan cabes riba awa, segun lider di partido. Cada tram cu a wordo busca ta costa mas o menos 1.772 miyon y Gobierno ta busca cuater pero dos ya caba a yega, segun Bikker.

GASTONAN OPERACION DI ZONNE TRAM TA MAS BARATA

PDR semper no solamente ta señala problemanan, pero nan ta bin cu posibel solucionnan. Varios biaha nan a bisa cu Gobierno mester a wak kico e municipionan na Hulanda a haci manera na Maastricht, unda cu nan a sinta studia e proyecto prome. Pa nan kibra caya cu tur e gastonan ta bay bin, retrasonan y dañonan cu lo bay bin na e comerciantenan, nan a bin cu e solucion di un zonne tram cu ta costa apenas 275 mil dollar pa un, segun Bikker.



Si Gobierno a cumpra cuater di e zonne tram, esakinan ta core riba tire y ta recarga nan mes. E gastonan di operacion lo ta minimo y no lo mester a molestia e comerciantenan, cu cuater aña largo nan no tin entrada. Pa colmo Gobierno no kier recompensanan

manera PDR a propone e ley di compensacion cu Hulanda tin si comerciantenan sufri pa mas di seis luna di trabounan publico y mester a gasta 29 miyon di florin, segun Bikker.

167 CAYA NO TIN ASFALT

Den wegen infrastructuur fonds cu lo wordo trata e siman aki na Parlamento, tin un budget di 10 miyon, apenas un par di caya por wordo asfalt. Den e preguntanan cu PDR a haci na Gobierno tin 167 caya na Aruba cu no tin asfalt.

Si Gobierno a studia e proyecto y haci manera Hulanda di busca zonne tram, nan lo tin atraccion cu ta pas den nan vision di “Green Economy”, lo a resta placa pa asfalta cayan, traha scol y resta placa pa haci hopi cos. Si tin placa pa parti lo ta otro, pero Aruba ta hinca den un debe nacional cu ta creciendo, Bikker ta bisa.

CIFRANAN DI BANCO

CENTRAL PA 2016

Segun e cifranan di Banco Central pa 2016 lo ta 6 biyon, Aruba ta bayendo na un debe inpagabel. Gobierno ta gastando placa pa loco y cada biaha cu señala nan esaki, nan ta critica cu ta bon trabou so nan ta haci.

E den e caso di tram, e intencion ta bon, embeyecemento di Caya ta bon, pero e manera di a ehecuta esaki a bay completamente robes y ta mal gastamento di placa so tabata tin, segun Bikker. Nan mes ta duna e cifra den e proyecto di ley, y p’esey nan no kier a yega Parlamento splica cuanto placa ta bayendo den dje. Loke cu Gobierno ta haci manera a wordo haci cu presupuesto, nan ta gasta e placa prome y despues ta yega Parlamento pa pidi aprobacion, segun lider di partido. Fraccion di PDR no por coopera cu actuacionnan asina, pasobra na final di dia pueblo a punta nan como representante pa controla gastonan di Gobierno. □